

UDHËZIM
Nr.212, datë 28.6.2010

**PËR MARRJEN DHE BASHKËRENDIMIN E MASAVE PËR GARANTIMIN E RENDIT
DHE RITJEN E SIGURISË PUBLIKE, GJATË SEZONIT TURISTIK VEROR 2010**

Në mbështetje të paragrafit 4 të nenit 102 të Kushtetutës së Shqipërisë, të nenit 7 të ligjit nr.9749, datë 4.6.2007 “Për Policinë e Shtetit”, të ligjit nr.8927, datë 25.7.2002 “Për prefektin”, të ligjit nr.8652, datë 31.7.2000 “Për organizimin dhe funksionimin e qeverisjes vendore”, të ligjit nr.10 220, datë 4.2.2010 “Për shpalljen e moratoriumit për mjetet motorike lundruese të Republikës së Shqipërisë” dhe të vendimit nr.343, datë 12.5.2010 “Për mjetet motorike lundruese që lejohen të qarkullojnë në zbatim të moratoriumit “Për mjetet motorike lundruese të Republikës së Shqipërisë” të Këshillit të Ministrave, me qëllim krijimin dhe garantimin për pushuesit të kushteve sa më të mira të sigurisë, ambienteve e standardeve për pushime në zonat turistike dhe përmbushjen e objektivave nga ana e strukturave të Ministrisë së Brendshme, në qendër dhe në bazë për periudhën e sezonit turistik veror 2010

UDHËZOJ:

-Ngritjen e shtabeve të punës për marrjen dhe bashkërendimin e masave për garantimin e rendit dhe rritjen e sigurisë publike gjatë sezonit turistik veror 2010, në rang qarku, të kryesuar nga prefektët dhe me përbërje:

- Kryetarin e Këshillit të Qarkut
- Drejtorin e Policisë së Qarkut;
- Komandantin e Batalionit të Mbështetjes Rajonale;
- Kryetarin e Bashkisë/Komunës;
- Shefi i Njësisë Rajonale të Policisë Rrugore;
- Shefin e PMNZSH për qarkun;
- Përfaqësuesin e emergjencave civile në prefekturë;
- Drejtorin Rajonal të Shërbimit Parësor;
- Drejtorin Rajonal të Rrugëve.
- Hartimin dhe miratimin e një plani masash dhe plani veprimi, të detajuar sipas stukturave përkatëse, për zbatimin e detyrave të caktuara nga shtabi i punës, brenda datës 5.7.2010.

I.Strukturat e Policisë së Shtetit brenda datës 1 korrik 2010, të marrin këto masa:

1.”Strukturat e Policisë së Shtetit, në përmbushje të ligjit nr.9749, datë 4.6.2007 “Për Policinë e Shtetit”, të ligjit nr.9959, datë 17.7.2008 “Për të huajt” dhe vendimit të Këshillit të Ministrave nr.362, datë 1.4.2009 “Për përcaktimin e kriterëve, procedurave dhe të dokumentacionit për hyrjet, qëndrimin dhe trajtimin e të huajve në Republikën e Shqipërisë”, të marrin masa për lehtësimin e procedurave të hyrje-daljeve dhe qëndrimit të shtetasve të huaj në vendin tonë në përputhje me standardet ndërkombëtare.

2.Strukturat e Policisë Kufitare dhe Migracionit dhe ato të Policisë Rrugore të rrisin bashkëpunimin dhe intensifikojnë kontaktet me strukturat homologe policore të Malit të Zi, Maqedonisë, Greqisë dhe Kosovës për zbatimin e marrëveshjeve të përbashkëta për çështjet kufitare, parandalimin e trafikeve të paligjshme e qenieve njerëzore, kontrollin e përbashkët të akteve rrugore në të gjithë territorin e vendin me shërbimin policor të Kosovës, si dhe kontrollin e lëvizjeve të personave me precedentë policorë dhe penalë.

3.Në varësi të fluksit të udhëtarëve dhe mjeteve në PPKK-të, drejtuesit e drejtorive rajonale të kufirit dhe migracionit të zhvillojnë takime dypalëshe me strukturat homologe të kufirit, me qëllim shtimin e sporteleve për përballimin dhe menaxhimin e fluksit dhe zgjidhjen e problemeve që mund të lindin.

4. Të merren masat tekniko-logjistike për të siguruar gatishmërinë dhe funksionimin e plotë e të pandërprerë të gjithë sistemit TIMS dhe gjeneratorëve të furnizimit me energji elektrike të këtij sistemi, për të siguruar një veprimtari normale dhe pa pengesa në regjistrimin e udhëtarëve në pikat e kalimit kufitar.

5. Strukturat e varësisë së Ministrisë së Brendshme të bashkëpunojnë me agjencitë e tjera të zbatimit të ligjit, si dogana, fitosanitaret, roja bregdetare, kapiteneritë, autoritetet portuale, agjencitë private etj., me qëllim lehtësimin e procedurave të kalimit të shtetasve dhe mjeteve gjatë sezonit veror, nëpërmjet një kontrolli efikas të kufirit dhe pa e cenuar sigurinë.

6. Drejtuesit e strukturave qendrore dhe vendore të Policës së Shtetit, si dhe ata të shërbimit të kontrollit të brendshëm të raportojnë çdo njoftim, sinjalizim apo ankesë të shtetasve për rastet e abuzimeve me detyrën, shkeljeve të kërkesave të Kodit të Etikës së Policisë, keqsjelleve, keqtrajtimeve apo shkelje të tjera të të drejtave të qytetarëve nga ana e personelit policor, duke mbajtur qëndrim në përputhje me akte normative, deri në ndjekje penale.

7. Policia e Shtetit të intensifikojë masat në drejtim të rritjes së sigurisë në rrugë, parandalimit të aksidenteve dhe krijimin e kushteve për një lëvizje e qarkullim pa pengesa të mjeteve e këmbësorëve, sidomos në akset rrugore Durrës-Morinë, Durrës-Qafë Thanë, Durrës-Vlorë. Shkodër-Tiranë, Tiranë-Durrës, Kakavijë-Gjirokastrë-Fier-Vlorë ose Durrës dhe Kapshticë-Korçë-Elbasan-Durrës.

8. Strukturat vendore të Policisë së Shtetit dhe ato të qeverisjes vendore të bashkëpunojnë për planifikimin dhe zbatimin e masave të përbashkëta për monitorimin e aktivitetit të lokaleve të natës, si disko, pube, duke evidentuar dhe moslejuar shkaktimin e zhurmave të cilat përbëjnë shqetësim për komunitetin etj.

9. Të bashkëpunohet ngushtë mes strukturave të linjës së Ministrisë së Brendshme me ato të Ministrisë së Punëve Publike e Transporteve, për përmirësimin e infrastrukturës rrugore, sinjalistikës rrugore, rregullimin e manaxhimit e trafikut në qendrat urbane sipas akteve të pushtetit vendor, si dhe duke kufizuar gjatë periudhës së verës, në zona apo orare të caktuara lëvizjen e mjeteve të rënda.

10. Strukturat e Policisë Kufitare dhe Migracionit, në bashkëpunim me drejtoritë e policisë së qarkut dhe kapiteneritë e porteve të marrin masa për evidentimin, regjistrimin dhe pajisjen me dokumentacionin e nevojshëm të gjithë motorëve të ujit.

11. Drejtuesit e njësive të qeverisjes vendore, në bashkëpunim me Policinë Kufitare dhe Migracionit, të marrin masa për:

- përcaktimin e zonës ku motorët e ujit lejohet të përdoren sipas përcaktimit të vijës së plazheve publike dhe/ose private të vëna në dispozicion nga bashkitë dhe komunat;
- vendosjen e shenjave kufizuese (bovat) ku të përcaktohen vendvendosja, hyrja apo dalja dhe zona e lejuar e lundrimit për motorët e ujit;
- oraret e përdorimit;
- përcaktimi i distancës për të gjitha plazhet sipas pozicionit dhe thellësisë së ujit, e cila të jetë jo më e vogël se 100-300 metra (sipas thellësisë së ujit) dhe jo më larg se 1 milje nga bregu;
- për vendosjen e shenjave kufizuese të bashkëpunohet me shërbimin hidrografik shqiptar.

12. Njësi të patrullave të Policisë së Shtetit dhe asaj bashkiake nga toka dhe të Policisë Kufitare e Migracionit e rojes bregdetare nga deti të bëjnë kontrollin e motorëve të ujit për:

- mënyrën, kushtet dhe kriteret e përdorimit;
- lëvizjen brenda zonave të kufizuara;
- dokumentacionin e tyre;
- të mos lejojnë largimin dhe afrimin nga/në breg me shpejtësi më të madhe se 4 nyje;
- të mos lejohet afrimi i motorëve të ujit në një distancë më të vogël se 200 metra tek mjetet e tjera lundruese që janë në lundrim, në spirancë, në radat e porteve detare etj.

13. Drejtoritë e policëve në qarqe, drejtoritë rajonale të PKM-së dhe bashkitë ose komunat, të marrin të gjitha masat për të ndaluar plotësisht aktivitetin e motorëve të ujit deri në

plotësimin e kriterëve të parashikuara në pikat 11 e 12 të këtij udhëzimi.

14. Të gjithë motorët e ujit, të cilët lëvizin pa u plotësuar kriteret e parashikuara në pikat 11 e 12 të këtij udhëzimi, duhet të bllokohen dhe sekuestrohen duke u konsideruar si aktivitet i jashtëligjshëm.

II. Kryetarët e bashkive dhe komunave dhe strukturat shtetërore në nivel vendor, në zbatim të ligjit nr.8652, datë 31.7.2000 “Për organizimin dhe funksionimin e qeverisjes vendore” dhe të akteve të tjera ligjore e nënligjore, brenda datës 1 korrik 2010, të marrin këto masa:

1. Kryetarët e bashkive dhe komunave:

a) për pastrimin e plazhit nga mbeturinat dhe largimin e tyre;

b) sigurimin e ujit të pijshëm;

c) sigurimin e shërbimit shëndetësor 24 orë;

d) eliminimin e zhurmave nga lokalet;

e) të ndihmojnë për sigurimin e trafikuit në qarkullimin e makinave dhe njerëzve;

f) sigurimin e shesheve për parkimin e automjeteve;

g) për dhënien e lejeve dhe vendvendosjen e mjeteve motorike të ujit, si dhe kontrollin e qarkullimit të tyre në det.

2. Kryetarët e bashkive dhe komunave të ngarkojnë strukturat e policisë bashkiake të bashkëpunojnë me strukturat e Policisë së Shtetit në zbatim të ligjit, për përballimin e trafikut të automjeteve dhe zgjidhjen e çështjeve brenda kompetencave.

3. Kryetarët e bashkive dhe komunave të bashkëpunojnë me pronarët e hoteleve, restoranteve, lokaleve publike për të dhënë informacionin e nevojshëm për pushtuesit tek strukturat e policisë, për të rritur shkallën e sigurisë në zbatim të ligjit.

4. Kryetarët e bashkive dhe komunave që kanë në territorin e tyre plazhe, të krijojnë dhe të sigurojnë funksionimin e grupeve të dhënies së ndihmës së shpejtë përgjatë vijës së plazhit në rastet kur rrezikohet jeta e pushuesve nga mbytjet në ujë, rreziku nga zjarri apo aksidente të tjera. Në rrugët hyrëse të plazheve, të vendosen tabelat me numrat e telefonit të shërbimeve të Policisë së Shtetit, të shërbimeve të emgjencës, të zjarrfikësve, grupeve të shpëtimit, si dhe tabela për zonat e rrezikshme për jetën.

5. Kryetarët e bashkive dhe komunave, në bashkëpunim me Policinë e Shtetit dhe rojen bregdetare, të marrin masa për zbatimin e kërkesave të këtij udhëzimi, duke caktuar vende të posaçme për motorët e ujit, si dhe kufizimet në det për lëvizjen e tyre.

6. Masat e marra gjatë këtij sezoni nga pushteti vendor dhe Policia e Shtetit të bëhen publike në mediat lokale apo kombëtare, duke kërkuar dhe bashkëpunimin e publikut për krijimin e një ambienti të qetë dhe të sigurt.

III. Ndjekja dhe raportimi

1. Prefektët evidentojnë dhe vlerësojnë informacionet ditore të dërguara nga kryetarët e bashkive dhe komunave, drejtoritë e policisë në qarqe dhe drejtuesit e strukturave shtetërore mbi zbatimin e planit të masave dhe planit të veprimit, si dhe të detyrave të parashikuara në këtë udhëzim.

2. Prefekti i qarkut me cilësinë e kryetarit të shtabit të punës, merr informacion ditor nga strukturat e Policisë së Shtetit, të zgjedhurit vendorë, drejtuesit e strukturave shtetërore në nivel vendor dhe raporton çdo të premtë, me shkrim në Ministrinë e Brendshme për zbatimin e planit të masave dhe planit të veprimit, si dhe të detyrave të parashikuara në këtë udhëzim.

3. Për zbatimin e këtij udhëzimi, ngarkohen prefektët, shtabet e punës, Drejtoria e Përgjithshme e Policisë së Shtetit, Drejtoria e Përgjithshme e Emergjencave Civile, Drejtoria e Përgjithshme e Shërbimit të Kontrollit të Brendshëm.

4. Ngarkohen zëvendësministrat e brendshëm për ndjekjen dhe monitorimin e këtij udhëzimi.

5. Ky udhëzim hyn në fuqi menjëherë dhe botohet në Fletoren Zyrtare.

MINISTRI I BRENDSHËM

Lulzim Basha